

李文饒文集

一

開化圖書館
Kaifu Library

開化圖書館

Kaishwa library

開化圖書館

Kaishua library

開化圖書館

Kathua library

李

文

饒

集

四部叢刊集部

中華圖書館
Zhonghua Library

上海涵芬樓借印
常熟瞿氏鐵琴銅
劍樓藏明刊本板
高營造尺六寸三
分寬四寸七分

開

館

U a

l i

b r

a r

r y

李文饒文集序

會昌一品制集

桂管都防禦觀察處置等使正議大夫持節
桂州諸軍事守桂州刺史兼御史中丞上柱
國榮陽魏開國侯食邑一千戶鄭亞撰

綸綽之興載籍之始先王發號施令明罰敕法蓋本
於此也唐虞之盛二典存焉夏殷之隆厥有訓誥自
胤征其誓乃有誓命之書皆三代之文一王之法也
虞夏之際代祀綿遠其代工掌制之名氏莫得而知
至于成湯太甲則有仲虺伊尹爲之訓誥高宗得傳
說則有說命之篇周公召公相成王則有洛誥酒誥

周官顧命秦始皇帝并一區宇丞相李斯實掌其言
漢興當秦焚書之後侍從之臣皆不習文史蕭曹之
輩又乏儒墨之用每封功臣建子弟其辭多天子爲
之縱委於執翰者亦非彰灼知名之士武帝使司馬
相如視草率皆文章之流以相如非將相器也厥後
寢微寔長下于魏晉亦代有其人我高祖革隋文物
大備在貞觀中則顏公師古岑公文本興焉在天后
時則李公嶠崔公融出焉燕許角立於玄帝之朝常
楊繼美於代宗之世洎憲宗皇帝英武啓運雄圖赫
張中興之業高映前古其時則先太師忠公翺翔內

署有密勿贊佐之績平吳定蜀時惟其功及登樞衛
作霖雨尊王室卑諸侯圖蔡料齊外定內理顯王言
於典誥彰帝範於圖籍紀在徽冊播於無窮特進太
子少保分司東都衛公長慶中事惠皇爲翰林學士
訓誥之業彰於前聞昭肅皇帝統握乾符寤寐良弼
詔自淮海復升台庭盡付玄機允猷神度每彤庭奏
罷別承天睠帝亦講伊訓說命之旨定元首股肱之
契以太平之制度上古之文教咸屬於公焉會先太
后懿號未立帝明發有永懷之痛公述沙麓神井之
瑞贊繞樞懷日之慶懋遵聖緒光慰孝思於是承命

有宣懿祔廟之制及武宗郊昊天拜清廟文物胥備
朝庭有禮華夷述職河朔修貢乃顯神休薦徽號奉
揚一德以示萬方於是撰仁聖文武至神大孝之冊
封域無虞天子脩然有求互之思乃範真金模聖表
隆準日角燭于宮庭中外臣寮咸欲頌山河而褒日
月也公於是有聖容之贊天街之北獫鬻攸居因饑
憑凌怙衆強禦嚴之以刀斗而勃爾無懼申之以文
告又坦然不率天子震怒旋命征之公獨運沉機上
資神斷萬里勝負決於帷中雷霆旣震犬羊遂潰疣
贅披抉腥膻解離遁其名王復我貴主公於是有討

北狄之詔天寶末薊門爲首亂之地長安並蒙榛棘
襲世未平至是漁陽帥張仲武掃除僭亂臧獲仇讎
奉揚威神乃底靖仍願勒石於陰山之塞以顯聖功
飛章上聞帝用允若公極渙汗明命舒展格吉呼嘯
神祇吐納嵩華當晝而文星現不寐而白鳳來彰諸
侯不朽之勲廣元后無爲之化公於是幽州紀聖
功之碑踞帥劉從諫死其子因關河之險恃甲兵之
衆乃敢揚聲進討拒命王庭中外疑迷牙撓天聽帝
凝思奮神武公累罄竒謀且曰重耳在喪不聞利父
死輒渠受戮祗以拒君况明皇舊官天井內地跨連

河北脅倚山東豈可行有匪人坐爲汙俗若是可忍孰不可容沃小無疑躡足乃定又曰上黨居天下之脊當河朔之喉今漳水雄兵常山勁卒是爲唇齒實懼因依不若乘其未萌制其將動帝俞其奏乃妙選使臣以勞諭之嚴立刑賞以勸戒之魏侯勦力從命絕壺關之右臂收沁水之上游獲茲渠魁在此成筭又轅門叛將橫水餘兇竊上相之旌旗盜晉陽之筦鑰帝怒斯赫人心愈疑咸以師老于郊梟巢尚固議罷兵者蚊聚請宥過者雷同公又揚笏而言曰彼地則義師帥分宗室是互祖勤商之邑后稷造周之邦

瓜瓞具存堂構斯在苟虧策畫不襲仇讎則是獎彌
牟逐主之風長冒頓射親之俗詩僭築室于道書謂
疑謀勿成由是洞啓宸衷大破群議運籌制勝舉無
遺冊防微慮遠必契神機授鉞之臣伏膺承命謝安
之園碁尚劫曹參之飲酒方酣果有軍書奏聞戎捷
砥磨周鉞水淬鄭刀萬里來袁尚之頭顱二塚奕虫
尤之肩髀歡聲雖震於朝市喜氣不見於形容何其
纂立功勲鎮定風俗若是之重也公於是伐上黨
之制平晉陽之敕宗英可汗獻琛輸寶越自絕域通
于本朝文畢伯士胤呼韓谷蠡之師或執玉而朝靈

園或解辦而拜其泉並垂於史冊光被明命公於是
有諭回鶻之命五慰堅昆之書四文章等於訓傳機
事出於神明固將偃仰邛石之符傲睨鬼籍之錄聞
之者可以祛聾瞶得之者可以弼邦國每牙管旣拔
芝泥將熟嘗於前席親授筆札公亦分陰可就簡如
飛時有急宣關於密畫內庭外制皆不與聞或勢切
疾雷幾難終日宣室未召武帳莫開公則䟽於封章
達於旒冕當乙夜觀書之際未嘗不備美再三此文
豈可與賦洞簫而諷於後庭聞子虛而嗟不同世者
論功較德邠歲在乙丑群公常伯以天子之道貫于

神祇一年而風雨攸序災沴不作一年殲醜虜北伐
之詩四年誅狡童詠東征之歌而又伐摩尼之風壞
浮屠之俗偃兵反朴四海胥定思欲增鴻名光下武
公乃觀東序之圖按西崑之謀鋪舒名實藻縟文質
類于上帝爲唐神宗公於是纂章天成功神德明道
之冊文號位旣畢華夷會同方將命禮官召儒者訪
匡衡后土之議採公玉明堂之圖考肆覲之禮於梁
生取封禪之書於太子盡皇王之盛事極臣子之殊
功而軒昂將成禹書就掩然猶進先嘗之藥獻高手
之醫藏周旦請代之書追漢宣易名之美作爲大誥

析于昊天始終一朝紹續九德其功閎也旣如彼其
制作也又如此故合武宗一朝冊命典誥奏議碑贊
軍機羽檄凡兩帙二十卷輒署曰會昌一品制集紀
年追聖德也書位旌官業也歲在丁邲亞自左掖出
爲桂林九月公書至自洛以典誥制命示于幽鄙且
使爲序以集成書尋玄珠不究於倪域聽希聲莫窮
於高下承命震惴幾移朝夕援筆而復止者三四伏
念江陸脩盪辭讓不及因濟絜以叙焉夫全功難持
大名難兼日赫於晝而乏清媚月皎於夜而無溫煦
冬之爲候也則雪霜飄暴凍入肌髮夏之爲用也則

金流石爍火走膚脉如陽春高秋者稀焉南則瘴風
毒虺之爲厲也北則獠戎黠虜之爲患也如雒邑咸
秦者幾焉鵬鷺不傳之以馳騁驂騑不授之以騫翥
如應龍者鮮焉仲尼聖賢之宗也位止於司寇師聘
道德之祖也宮不過柱史如姬旦者幾焉是以保衡
傳說左右殷宗召公畢公寅亮周室咸著大訓克爲
元龜書契以來未之多有李斯以刻石紀號之文勝
而不在休明之運又何足數哉周勃霍光雖有勲伐
而不知儒術枚臯嚴忌善爲文筆而不至廊廟自是
已降其類寔煩惟君蘊開物致君之才居元弼上公

之位建靖難平戎之業垂經天緯地之文粹乎歛躬
由是人仰德益四序之陽春九州之咸維品彙之應
龍人中之姬旦也後之學者其景行之

開化園書
Harvard Lib

李文饒文集卷第一

四魚圖籍

會昌一品制集

徽冊 讚

徽冊 讚

上尊號玉冊文

仁聖文武至神大孝皇帝真容讚 并序

上尊號玉冊文

會昌二年

奉敕撰

維會昌二年歲次壬戌四月乙丑朔十四日戊寅攝

大尉光祿大夫守司空兼門下侍郎同中書門下平

章事臣德裕銀青光祿大夫守尚書左僕射兼門下

侍郎同中書門下平章事臣夷行金紫光祿大夫尚

書右僕射兼中書侍郎同中書門下平章事臣拱銀

青光祿大夫守中書侍郎同中書門下平章事臣李
紳及文武百官金紫光祿大夫檢校司徒兼太子太
保臣僧孺等六十五百七十四人言臣聞羲皇首太
古之號成湯顯神武之稱我高祖皇王是憲尊名若
古貽厥丕訓爲子孫之法豈不善始善述哉矧乃臣
唐受命繼體承業理運將至大君以興昊穹所以開
至聖也曩者明兩未定帝華不協捨胤傳聖深惟至
公先后所以昭天命也亦猶堯發於唐虞文興於代
邨神明之祚不其難哉伏惟皇帝陛下清明溥鬯光
耿四海玄德莫鄰天休大賚日角見表氣志如神爰

初定命正心理物如辰居極而天下無邪矣由是昭
德塞違尊賢遠佞禹不自滿成不敢康罔盤于田不
適于色自閨壺以施王教由家道而刑國風去比周
覈名實擊乾綱擇聖紀修舊典協誠質圻嘉壇欵泰
一進正臣以端治表禮故老以求讜言遠無蔽獄近
無留命祈玄祖而膏雨降祀靈岳而嘉穀登省刑罰
而蓬字消爇倉廩而螽螟息去歲龍旂承祀大輅親
郊捧玉瓚而一獻光靈來格振金石而六變魄寶昭
臨然猶古訓是學緝熙于道天文炳煥雲漢其章溫
恭敬遜承太任之教和樂愷悌洽戚藩之心德風偃

于群黎威震動乎絕域又以敬養不逮於長樂昭配
未升於禰宮每懷嗣徽烝烝而慕所以奉若慈訓對
越兩儀因心立制永錫其教寬虔劉之罪興惻隱之
仁回電收霜爲之反汗及單于慕義景附朔邊耀德
戢兵謙臨是受至於備文物展國容莫不先甲而布
其澤丁辰而廓陰羽和景晏溫卿霽網緼斯所謂神
祗之心應矣天人之際交矣於是服冕之士戴鶡之
倫暨藩侯邦伯黃髮鮐背不謀而進曰陛下玄默天
睟輝光日新大矣孝熙四極爰臻誠宜玉版溫潤鏤
鴻明之德神寶焜耀薦萬斯之年丕夫大典不可辭

也陛下猶謙退固拒至于三四群臣不已乃曰俞哉
夫徧覆包含之謂仁極深研幾之謂聖憲度著明之
謂文蠻夷震懾之謂武感而遂通之謂神無思不服
之謂孝臣等不勝大願謹奉玉冊玉寶上尊號曰仁
聖文武至神大孝皇帝伏惟陛下乾健不息謙尊而
光樂戒其耽禽戒其荒壽乃侔於殷宗俗乃厚於成
康貽燕後昆受福無疆臣德裕等誠歡誠躍頓首頓
首謹言

上尊號玉冊文 會昌五年

維會昌五年歲次乙丑正月己酉朔一日己酉光祿

大夫守太尉兼門下侍郎同中書門下平章事臣德裕光祿大夫守尚書左僕射兼門下侍郎同中書門下平章事臣恂朝議大夫守尚書右僕射兼中書侍郎同中書門下平章事臣讓夷朝議大夫守中書侍郎兼戶部尚書同中書門下平章事臣崔鉉及文武百官太中大夫太常卿臣孫簡等六千二百二人言臣聞在昔周宣撿抗內侵四杜薄伐以定王國則詩人大其功暨于漢宣北夷乖亂呼韓慕義郅支遠遁則簡策著其美惟此二代僭爲中興問者開成之未星孛如雲螟飛蔽天先帝戚之黎人懼焉乃授至聖

遺大投艱迄茲成功厥有冥敷伏惟仁聖文武至神
大孝皇帝表應龍翼粹合乾剛神全而正氣凝宇定
而天光發智燭千里動必察微心鏡萬機物來斯應
於是三材用四維張建中和之極綴前聖之綱重樞
機脩法制刑御家之理無出壺之言銷讒邪遠佞幸
絕背公之黨退好徑之人內嚴體貌增堂陛之峻外
絕締交去輔車之勢古所謂受命於天惟舜獨正也
又曰一心定而萬物服惟陛下得之曩者北狄矜功
耗蠹中國種類繁牙根柢封殖異術肺腑縞衣如荼
挾邪作蠱浸淫宇內倒懸不解石有餘年旣而龍祠

堙滅携國款塞質帝女感海疆有狼顧平城之心鯨
吞咸洛之志爰命梟將舉旗剛旃兵塵穹廬火烈荆
榛颺芟幘碎輶輓六羸遁逃貴王生還剗滅妖迹剗
除醜類故名王結髮冠帶入臣堅昆稽首鞮譯來獻
而又姦臣放命二紀陸梁據太行之固下窺洛邑通
故絳之道旁睨近關樹其遺孽以竊兵柄議者僉曰
精甲十萬積穀十年泉魚不察湯網宜懸陛下雄斷
霆聲群疑冰釋揚清風而掃雲鼓迅雷而破山任馮
異則拔天井而振上黨仗吳漢則發突騎而窺邯鄲
壺關夫險山東奪魄屬有戍邊叛將竊發參墟人心

搖蕩異議放肆陛下臨朝而言曰二寇獲罪於天子
所不捨未三旬而定晉地纔暮年而滅澠子不以金
購稀將多降不勞師克粵首馳報非至德感物孰能
臻於此乎由是台宰有辟藩屏將帥上言曰成伐東
夷而肅慎來賀景剪七國而王室乃安莫不始於武
功終致刑措將以禋上帝薦祖宗宜受鴻名以答玄
貺陛下猶謙遜而五讓之勤請弗已乃屈已以俞之
雲漢爲章所以昭法度也神明其德所以成教化也
魏乎有功帝堯之則也勤于大道玄祖之訓也臣等
不勝大願謹奉玉冊玉寶上尊號曰仁聖文武章天

成功神德明道大孝皇帝伏惟陛下不有其名以保其成不德其功以戒其盈享殷宗之福致周道之平熙我王度玉振金聲臣德裕等誠歡誠躍頓首頓首謹言

仁聖文武至神大孝皇帝真容讚并序

仁聖文武至神大孝皇帝御極之五載氣應天和德感人心朝廷四方感一於正以精蕩侵以道勝殘故得風雨時若螽螟歲息銷逢孛爲休氣驅戎狄爲懷人北荒堅昆重譯而至厥有箝伐憑阻弄兵陸梁肅願旣伐風沙自縛武功旣成體德昭明前古未聞百

王莫致之事皆歲筵於圖謀矣皇上以爲大禹叙九疇敬五事豈不曰貌恭則莊視明則止予欲作績傳照審其儀形且夫聖人潛心於天以通神明先定其神而萬物理矣昔之訪具茨期姑射在此而已况乎廣成之戒抱一玄元之去多欲予所貴道良謂是矣豈眩夫係風之言竒彼淖冰之術從偃佺之所珍遺堯舜之令命各哉於是圖輕素寫良金擬鑑形於止水若凝視於清鏡五彩旣彰穆穆皇皇居列仙之館近玄祖之光蓋以昭燕翼之謀顯丕承之德矣臣聞古之至聖必有竒相是以黃熊之瑞應於龍體赤精

之符協於圖表頌然而長文王所以新天命也體貌
多竒漢高所以威海內也然則績事之微極於微肖
至於天光晬清日光明潤非可圖也度髮髯焉末臣
奉詔敢颺言曰

唐運中興天授大君軒耀其武堯煥其文北伐撿
朔漠消氛西伏堅昆稽首稱臣稜生壺關盜起河汾
沈機先物雄斷解紛克定群慝竟全大勲八表旣寧
萬機益勤爰命彩績載模天真崑閬仙岑峻極秋旻
蓬瀛白日光照清晨涵育如天尊嚴若神輝赫綢緼
爲龍爲雲聖作物覩禎祥以臻宣光孕靈虞熙載甄

政建中和金聲玉振太堦旣平廟噐乃陳化下以德
持盈以仁四瀆宗海衆星拱辰億萬斯年藻朗日新

李文饒文集卷第一

開化圖書館

kuahua library

李文饒文集卷第二

會昌一品制集

紀功

幽州紀聖功碑銘

異域歸忠傳序

黠戛斯朝貢傳序

幽州紀聖功碑銘

并序

奉敕撰

幽州盧龍軍師檢校尚書右僕射張公仲武往年修
獻捷之禮今年有銘勳之請二者君子躋之豈不以
諸侯有四夷之功獻其戎捷春秋舊典也宗周納肅
慎之貢銘於楛矢天子令德也斯可以爲元侯衆可

以爲後代法聖上嘉其動而中禮乃命宰臣採其元
功傳於惇史臣德裕敢颺言曰夫兵者所以除暴害
也愛人則惡其爲害禁暴則惡其爲亂雖睿智不殺
化之以神至德允懷招之以禮然書有措夏之戒傳
有脩刑之訓虞舜四罪乃成大功文王一怒以至無
侮非德教之助歟仁聖文武章天成功神德明道大
孝皇帝熙我文典煥乎光明極象外之微臻於至道
鼓天下之動致於中和慮必鈎深退而藏密故能神
機獨照伐未兆之謀威光遠震制不羈之虜當其時
也烽燧迭警羽書狎至人心大搖群師沮氣皇帝以

軒后之威神漢高之大畧光武之雄斷魏祖之機權
合而用之以定王業此議臣所以不敢望於清光也
倬哉天地應而品物生君臣應而功業成故龍躍而
雲從鶴鳴而子和方牀伐獫狁蠻荆來威安遠擊車
師西域振服宜有良將歿于朔邊張公禮閱戰器書
成傳癖張仲孝友子孺塞泉流落不偶光景未耀明
主雅聞竒志將帥而捍將軍遙推赤心築壇而命元
帥非自雄武授之薊門果能精誠奮發策慮徧億千
里獻籌一心憂國則知龍顏善將任人傑而不疑日
角好謀歎敵國而強意回鶻者本北狄之裔也或曰

獯狁或曰山戎五帝所不能臣三王所不能制前史
載之詳矣暨薛延陀之敗也酋帥吐迷度率衆款塞
太宗幸靈武納降立回鶻部落置瀚海都督因我封
殖遂雄北方肅宗之戡內難也葉護以射鶻之士親
護戎旌亦由羌髻率師以翼周北貊梟騎以助漢旣
殄大憝乃疇厥庸特拜葉護司空歲賜繒二萬疋厥
後飾宗女以配之立宮室以居之其在京師也瑤祠
雲構甲第棊布棟宇輪奐衣冠縞素交利者風偃挾
邪者景附其翎戾貴種則被我文績帶我金犀悅和
音馱珍膳蝸蠹上國百有餘年旣而傑鰲無親天命

不祐僭侈極欲神道惡盈本國荐飢畜產耗半黠曼
斯因秋乘便遂焚龍庭區落蕭條陰燐青焚今之烏
介可汗亡逃失國竊號沙漠非我冊命自爲假王其
來也羨漫陰山睥睨高闕玄塞之下氛霧蔽天質貴
主以前驅傾大國而求援或丐我米糒抹其飢人或
邀我甲兵復其故地外雖柔服內有桀心因行人致
詞徵呼韓故事願居光祿塞急保受降城其下有二
部曰赤心宰相那頡啜特勒赤心者天性忿鷙我馬
尤盛初與名王嗚沒斯首謀內附俄而負力怙氣潛
圖厲階爲嗚沒斯所給誘以俱謁可汗戮於帳下其

衆大潰東逼漁陽上乃賜公璽書授以方畧公以室
帝悍亟之兵近我邊鄙俾其偵邏且禦內侵尋以徵
後不供爲虜所敗由是介馬數萬連亘幽陵伏精甲
於松楸布穹廬於磧鹵散若飛鳥止如長雲火燎於
原不可嚮邇公激義氣以虹貫發精誠而石闢竒計
兵權密授髦俊乃命介弟仲至與裨將游奉寰王如
清左敵萬李君慶張自榮高守素李志操率銳兵三
萬建旆而前介胄雪照戈矛林植命以義殉壯由師
直聲隆隆而未洩欲逐逐而不食戢以聽命嚴而有
威公曰險道傾反且馳且射胡兵所以無敵也致之

平原勒以方陳我師可以逞志也於是據于莽平環
以武剛首尾蛇伸左右翼張輕騎旣合竒鋒橫蒼如
摧枯株如搏畜兔攝龍言者弗取陸梁者皆仆虜王侯
貴人計以千數然後盡羅服聽悉數系纍谷靜山空
靡有孑遺橐駝馱馱風澤而散旃墻芟幕野

馬牛幾至於谷量虜血殆同於川決徑踞寶刀祭天
金人竒貨珍噐不可殫論乃命從事李馳傳

上奏又命牙門將國從紀繼獻戎俘皇帝受而勞之
群臣畢賀昔長平七征驃騎一舉竇憲合氏戎之衆
陳湯搃城郭之兵或生靈減耗士馬物故或邊功抹

罪矯命專征然猶告類上帝薦功清廟願視二漢不
其愆歟以公威動蠻貊功在漏刻因命公爲東面招
撫回鶻使先是奚契丹皆有虜使監護其國貴以歲
遺且爲漢謀自回鶻嘯聚靡不鳴張公命裨將石公
緒等諭意兩部戮回鶻八百人雖介子討罪於龜茲
班超行誅於鄯善未足儔也回鶻又遣宣門將軍等
四十七人詭辭結歡僭伺邊隙公密賂其下盡得陰
謀且欲馳入五原大敗雜虜公逗留其使緩彼師期
竟得人病馬瘠縮衄而退挫銳解紛繫公善計今烏
介自絕皇澤莫敢近邊并丁令以圖安依康居而求

活盡徼餘種屈意黑車寄託遠道流離飢凍黑車亦
倚其威重迫脅諸戎造謀藉兵解仇交質自謂約齎
深入漢將取而未期渡幕輕留三師往而非利公以
壯猷遠馭長討羈縻不媮避憚之便終致盡敵之術
將時動而得雋豈歲數而勝微矧乎明主仗將師爲
爪牙視戎狄爲鼠薺方獵猛敵不翫細娛非周宣魚
以成召虎之勲非漢宣無以聽管平之計勗哉上將
先我中興公前後受降三萬人特勒二人可汗姊一
人都督外宰相四人其他侯王騎將不可備載王褒
以日逐歸德稱爲人瑞班固以稽落盪寇大振天聲

孰若天子神武百蠻振懼乘其感困臨以兵鋒刈單
于之旗納休屠之附非萬里之伐無三年之勤魏乎
成功輝焯後代宜刻金石以揚鴻休銘曰

大和之初赤氣宵興開成之末彤雲暮凝異鳥南來
胡徵之滅北夷颯掃厥國土崩逼迫遷徙震我邊鄙
長蛇去穴奔鯨失水上都薊門兵連千里曾不畏天
猶爲驕子丐我邊穀邀我三師假我一城建彼播旗
歸計強漢郅支媠詞狼顧朔野伏莽見誅鴈門之北
羗戎雜處澌澌群羊茫茫大鹵縱其梟騎驚我牧圉
暴若豺狼疾如風雨皇赫斯怒羽檄徵兵謀而淵默

斷乃雷聲沉機變化動若神明沙漠之北虜無隱情
漁陽突騎燕歌壯氣赳赳元戎耽耽虎視金鼓誓衆
干旄蔽地爰命介弟屬之大事翩翩飛將董我三軍
稟兄之制代師之勤威畧火烈胡馬星分戈回白日
劍薄浮雲天街之北旄頭已落絕轡之野蚩尤未縛
俾我元侯恢弘遠畧取彼單于係之徽索陰山寢烽
亭徼橐弓萬里昆吾九譯而通蠻夷旣同天子之功
儒臣篆美刊石垂鴻

異域歸忠傳序

會昌二年四月甲申回鶻大特勒唱沒斯率其國特

勒宰相尚書將軍凡十二人大首領三十七人騎士
二千一百六十八人內附制授噶沒斯特進檢校工
部尚書左金吾衛大將軍同正封懷化郡王其酋帥
徧加戎秩賜之金紫於是穹廬之長盡識漢儀左衽
之人咸被王澤矣臣聞書載率服美大舜之功詩
列旣平顯周宣之德暨漢宣帝亦單于慕義呼韓來
朝歷紀數千稱者三代則知非常之運必待非常之
君誠契感通斯爲難遇伏惟仁聖文武至神大孝皇
帝紹高祖太宗之神武慕玄宗憲宗之遠畧英才天
縱武節霆馳靜深之謀淵然若海先難之志屹然若

山自嗚沒斯歸歟朔邊注心魏闕制置大畧盡出宸
算漢高從善能用六奇光武揣情坐知千里諸將無
舉旗之効群臣乏借箸之籌夫天以信而成功地以
定而載物惟大君懋一德法兩儀故能懷異俗之心
盛中興之業嗚沒斯者回鶻之貴酋也夙稟正性生
知大義識倚伏之數明禍福之機回鶻運屬天亡歲
久不稔畜產大耗國邑爲虛流亡徧於沙漠僵仆被
於草莽由是國之將帥各率支兵或入西戎或歸諸
部惟嗚沒斯精誠上達天誘其衷拔自狼居之山願
拜龍顏之主封章瀝懇指日誓心不奪之誠介如石

矣先是有赤心宰相桀傲亂常頗爲邊患嗚沒斯潛
布誠款於天德軍使田牟暴其罪狀梟首以徇歸大
國明也戴聖君忠也去亂邦智也執醜虜義也其比
四夷悉謂誠臣昔仲凡之曾參孝因爲陳君臣父子
之義以著孝經今聖主以嗚沒斯忠爰採武義貞烈
士以爲歸忠傳則聖人著誘之道又何以加於此乎
廼集秦漢以來至聖朝去絕域歸中國獲名節自著
功業保終者三十人勒成上下兩卷其不因獻款無
迹可稱者今並不載臣又聞著者天報之以福爲不
善者天報之以殃神道昭晰應如影響嗚沒斯方欲

保大節成大勲宜乎佩服斯文以爲鑒戒臣備位台
鉉獲奉睿謀受詔序事冠于篇首

黠戛斯朝貢圖傳序

昔越裳貢雉薦於宗廟西旅獻獒陳以典訓所以感
其至而戒其初也仁聖文武至神大孝皇帝御曆之
四年天瑞燦爛王道昭焯五材並用六轡斯柔布政
宣室以張神化報兵朔野以耀威靈故得天晬而清
日晏而明蟲螟不生嘉穀以成中寓旣安四夷來庭
由是龍荒君長黠戛斯遣使注吾合素等上表獻良
馬二疋絕大漠而貢赤誠涉流沙而霑赭汗非至德

所感孰能臻於此乎皇帝以前有鸞旂焉用騏驎不
貴龍友惟駕鼓車乃命其使見於內殿賜以珍膳錫
之文錦謹按故相魏國公賈耽所撰古今四夷述黠
戛斯者本堅昆國也貞觀二十一年其酋長入朝授
以將軍印拜堅昆都督逮于天寶季年朝貢不絕暨
中國多難爲回鶻隔礙黠戛斯忿其桀驁乘彼荐飢
於是破龍庭焚芻幕蕭條萬里地無種落始得出重
泉而見白日披氛霧而覩青天臣伏見太宗謂群臣
曰南荒西域自遠而至其故何哉宰臣房玄齡對曰
殊域來朝者中國又安帝德遐被所致也太宗曰向

中國不安亦何緣而至朕覩此懷懼何者昔秦始皇
并吞六國漢武帝威加戎狄今殊方異類無遠不賓
竊比秦漢想無多愧亦欲傳之子孫念二王之末途
朕所以不能不懼爾臣伏思太宗往日之懼致我唐
百代之隆則聖祖詒謀可謂深矣此太宗所以永保
鴻名爲受命之祖陛下所以丕承王業爲中興之主
豈不宜哉天旨以賈耽有陳平鎮撫之才得克國通
知之敏其所述作該明古今乃詔太子詹事常宗卿
祕書少監呂述往蒞賓館以展私覲稽合同異視縷
闕遺傳胡貊堯離之音載山川曲折之狀條貫周備

文理洽通臣伏以貞觀初中書侍郎顏師古上言昔周武王天下太平遠國歸款周史乃集其事為王會篇今萬國來朝蠻夷率服實可圖寫請撰為王會圖有詔從之臣輒因肅宗卿呂述所紀異聞飾以續事敢叙率服以冠篇首

李文饒文集卷第二

化廣
Wahua

李文饒文集卷第三

會昌一品制集

制

宣懿皇太后祔太廟制

宣帝改名制

遣王會等安撫回鶻制

討回鶻制

討劉稹制

授王宰兼克河南諸軍攻討使制

授劉沔招撫回鶻使制

授張仲武東面招撫回鶻使制

宣懿皇太后祔太廟制
奉敕撰

門下朕近因載誕之日展承顏之敬太皇太后謂朕曰天子之孝莫大於丕承人倫之義莫重於嗣續穆宗睿聖文惠孝皇帝厭代已久星霜屢遷禰宮曠合食之禮惟帝深濡露之感宣懿皇太后長慶之際德冠後宮夙表沙麓之祥實茂河州之範先朝恩禮之重中壺莫借况誕我嗣君纘承宣宗已協華於先帝方延祚於後昆思廣詒謀庶弘博愛爰遵舊典以慰孝思當以宣懿皇太后祔太廟穆宗睿聖文惠孝皇帝室率是彝訓其敬承之朕祗奉慈旨載深感咽宣

示中外咸使知聞主者施行

仁聖文武章天成功大孝皇帝改名制

王者照臨萬寓名豈尚於難知敬順五行理宜避於
勝伏徵諸前史義貫炳然昔炎漢之興洛滂去水所
都名號猶乃避之况我國家運昌土德豈可以王氣
勝於君名所以憲宗繼明之初實已捨水必有冥數
叶於禎祥漢宣帝柔服北夷弘宣祖業功德之盛侔
於周宣御曆十年乃從美稱朕遠惟大漢之事近稟
聖祖之謀爰擇嘉名式遵令典敬承天意永保鴻休
宜改名爲炎仍令所司擇日分命宰臣告天地宗廟

其舊名中外表章不得更有回避布告遐邇咸使聞知

遣王會等安撫回鶻制 奉敕撰

敕自古令王撫寧荒服忠於國者則有繼絕之恩順於道者則有固存之義所以厚其嚮化優以報功回鶻累代姻親久修臣禮服我聲教保茲信誠嘗以國難識其忠良嚴霜見其貞松疾風知其勁草未言勲力豈忘予懷如聞爲紇斡斯所攻兵折衆叛畜產大耗國人存飢流離轉徙遠踰沙漠近因太和公主遣使入朝已知新立可汗寓居塞下告窮請命未有所

歸每念艱危載深憫惻今欲抹邱竊困撫慰瘡痍使
四方知朕不忘舊勳保其大順昔匈奴乖亂呼韓款
塞漢宣帝轉粟賑救權而施宜故得三代稱藩北邊
罷警前令典可不務乎宜令右金吾衛大將軍兼御
史大夫王會持節充安撫大使宗正少卿兼御史中
丞李師偃充副使專往慰問仍賑米粟二萬石俾期
安輯離散漸就漢南再復舊疆永保恩好宣示中外
宜體朕懷

討回鶻制

奉宣撰

門下夫天之所廢難施繼絕之恩人之所棄當用侮

亡之道朕每思前訓豈忘格言回鶻比者自恃兵強
 久為桀驁凌虐諸部結怨近隣紇圻斯潛師彗掃穹
 廬瓦解種族盡膏於原野區落遂至於荆榛今可汗
 亡逃失國竊號自立遠逾沙漠寄命邊郵朕深念衰
 殘尋加賧卹每陳章表多詐諉之詞接我使臣如全
 盛之日無傷禽哀鳴之意有困獸猶鬪之心去歲潛
 入朔川大掠牛馬今春掩襲振武逼近城池可汗皆
 自率勁兵首為寇盜不耻破敗莫顧姻親河東節度
 使劉沔料敵伐謀乘機制勝戮胡貊之騎以為前鋒
 搴翎一本作翽湯傳一作翽搴一作翽侯一作翽之旗一作翽戈彼在穴短兵鏖於

帳下元惡軼於穀中况乘匪六羸象總一旅儲糧已
竭計日可擒太和公主居處不同情義久絕懷土多
畏函聞黃鵠之歌失位自傷寧免綠衣之歎念其羈
苦常軫朕心今者脫於豺狼再見宮闕上以攄宗廟
之宿憤次以慰太皇太后之深慈永言歸寧良用欣
感其回鶻旣以破滅義在剪除宜令諸道兵馬並同
進討河東立功將士以下優賞續次條流處分應在
京外宅及東都修功德回鶻並勒冠帶各配諸道收
管其回鶻及摩尼等莊宅錢物等並委功德使與御
史臺京兆府各差精強幹事官點檢收錄不得容諸

色職掌人及坊市富人輒有影占如有犯者並當極
法錢物納官摩尼寺僧委中書門下即時條疏聞奏
於戲昔漢宣帝值匈奴乖亂推亡固存呼韓單于携
國歸命入朝保塞漢后所以有擁護之恩郅支單于
背叛禮義傷毀威重漢史所以明可誅之罪二虜禍
福皆自取焉四夷百蠻宜以爲鑒布告中外深體朕
懷主者施行

討劉禛制

奉宣撰

門下定天下者致風俗於大同安生人者齊法度於
畫一雖晉之樂趙家有舊勳漢之韓黥身爲佐命至

於干紀亂律罔不梟夷禁暴除殘古今大義劉悟填
居海岱嘗列牙爪屬師道阻兵六師問罪三面開網
一境離心乘此危機遂能歸命憲宗嘉其誠款授以
南燕穆宗待以腹心委之上黨招致死士固護一方
逮於末年已虧臣節劉從諫生稟戾氣動扇剛風因
跋扈之資以專封壤恃紀綱之律以逞驕恣暫展執
珪之儀終無上綬之請隙駒爲樂魏豹姑務於絕河
井蛙自居孫述頗聞於巴蜀大受亡命妄作妖言中
訶朝廷潛圖左道輒謀動戎師屢奏陰謀顧者邠之
可矜豈泉魚之是察暨乎沉痾魯靡哀鳴猶駐將盡

之魂恣行邪僻之志罔惑舊校樹立狡童中使挾醫
莫覩其朝服近臣銜命不入於壘門逆節甚明人神
共棄其贈官及先所授官爵并劉稹在身官並宜削
奪成德軍節度使王元逵魏博節度使何勣敬或姻
連王室或任重藩維懇陳一志之誠願揚九伐之命
吳漢任職受詔而初無辦嚴卜式朴忠未戰而義形
於內况成德軍嘗以驍騎橫衝者破朱滔戰勢方酣
再回魯陽之日鼓音不息三周不注之山魏博軍亦
以大旆涉河竟殲師道建十二郡之旗鼓以列降人
削六十年之厲階盡歸王化士賈餘勇軍有雄名必

能稟鄴侯之指蹤成葛亮之心伐洛汝二師朕尤注
懷元逵守本官克北面招討澤潞使弘敬守本官克
東面招討澤潞使潞府曩者烈祖在藩先天啓聖符
瑞昭晰績事煥於泗亭鑿輅巡游金石烈於代邸寔
爲可封之俗又爲仁壽之鄉艱難以來頗著誠節必
非同惡咸許自新其昭義軍舊將士及百姓等如保
初心並赦而不問昭義軍舊大將等如能舍逆效順
以州郡兵衆歸降者必厚加封賞如能擒送劉稹者
別授土地以振勳庸其村鄉百姓如所在團結歸順
者亦加爵賞劉悟下鄆州舊將校子孫及劉從諫近

招致將士等喻以善道宜聽朕言凡秉義立名須明
太順未有忠於所奉上悖君親昔郤至有言受君之
祿是以聚黨有黨而爭命罪孰大焉田橫能得士心
人多致命伏於海島莫敢搢狂及漢高召之奔走向
闕豈嘗違拒漢使留止田橫唯慕殉以成仁不相挺
而作亂故得其王歿延殊寵光顯令名爾等既有義
心宜思改悔如能感喻劉稹束身歸朝必當待之如
初特與洗雪爾等舊校亦並甄酬仍委夷行劉沔茂
元各務進兵同力攻討其諸道進軍並不得焚燒廬
舍毀掘丘墓擒執百姓以爲俘囚桑麻田苗皆許本

戶爲主罪止元惡務安生靈於戲藩維大臣抗疏於
外髦雋舊老昌言於朝我朕以祖宗之法不可私一
族刑賞之柄所以正萬邦宜用甲兵陳於原野雖朕
以恩不聽群臣以義固爭詢自僉謀諒非獲已布告
中外明體朕懷王者施行

授王宰兼克河陽行營諸軍攻討使制

奉敕撰

敕淮南勁兵伏灌夫之勇河內雄屏委寇恂之忠各
用所長俾專大任以茲制勝斯爲良圖忠武軍節度
使銀青光祿大夫檢校工部尚書兼許州刺史御史

大夫上柱國王宰結髮從軍擁旄爲將一劍橫陳萬
筭皆全陰則難窺勇能重閉亞夫急緩之任繼父絳
侯祭彤禦侮之才爲吾子路近者狂寇憑阻屢犯顏
行茂元莫遑定居驟聞三捷願言奮旅方展六奇遽
屬爽秋暫嬰寒泄誠威重之可倚顧卧護之未任是
用改爾乘軒總齊諸校隱如敵國禦彼奔衝昔韓信
建旗出井陘之隘鄧艾束馬越陰平之艱皆立奇功
稱爲名將爾宜自厲無愧前良

授劉沔招撫回鶻使制 奉宣撰

昔東漢中夏旣寧匈奴飢饉滅宮請命將臨塞圖刻

石之功光武報云柔能制強且傳聞之事常多失實
雖滅大寇不如息人朕每覽前史爲之興歎又以大
禹修德有苗歸心周穆徂征荒服不至固存取亂在
擇良圖回鶻頃以本國荐飢落種携貳紇圻斯乘其
衰亂遂覆危巢旣焚老上之庭盡剪名王之族可汗
失地遠害來附塞垣朕言念姻親不忘勲力諭以呼
韓欵塞漢氏舊章戎不亂華國之大典且分兵食掾
彼飢人令歸漠南方議賑贍屬可汗久嬰沉痾酋長
異心雖隨畜荐居固無定所而控弦深入頗亦渝盟
邊將戎臣屢抗章䟽策慮偪臆咸請驅除朕以王者

之師以全取勝匈奴見短嘉婁敬之善籌馬邑設權
戒王恢之兵首推誠含垢亦以喻時况朔夜沍寒有
鞞瘃之患陰山遙蹠多曲折之艱宜以德綏豈勞兵
碎某官劉沔久臨沙漠頗識虜情旣落十乘之行必
致六羸之遁委之告諭方俟成功可守本官克招撫
回鶻使如不自改悔終須驅逐其諸道行營兵馬使
權令指揮主者施行

授張仲武東面招撫回鶻使制 奉宣撰

門下古人云兵者所以明德除害也故舉得於外則
福生於內朕每念戎事務安生靈旣獲遠圖宜恢長

筭回鶻可汗寄託塞上未歸虜庭近者遣使薊門懇
陳誠款宋人病告於子反朝鮮心附於樓船繫我信
臣實得要領幽州盧龍軍節度副使知節度事觀察
處置押奚契丹兩蕃經畧盧龍軍等使銀青光祿大
夫檢校工部尚書兼幽州大都督府長御史大夫蘭
陵郡王食邑三千戶張仲武風雲感契息藻協誠自
升將壇首剪狂寇戈鋌亟聞於堦掃牛馬殆至於谷
量故能望影揣情已探致虜之術豈止聞風破膽益
堅慕義之心遽奏封章願申告諭彼旣率服寧忘懷
柔况虜騎往來疾於風電沙場夔邈介以山川臨敵

應機固難統一昔衛霍之襲單允異道而征辛趙之
繫罕羗兩從其志成予廟勝之策在舉髦傑之臣俾
爾鷹揚挫其狼顧將復蠻夷之叛固在七擒勉思將
帥之風無忘無利崇以夏官之秩委其統制之權當
竭一心敬茲休命可檢校兵部尚書兼充東面招撫
回鶻使其當道行營兵馬使及奚契丹室韋等並自
指揮餘如故主者施行

李文饒文集卷第三

李文饒文集卷第四

會昌一品制集

制

授王元逵平章事制

授石雄晉絳行營節度使制

贈斐度太師制

贈陳夷行司徒制

贈崔瑄左僕射制

贈王茂元司徒制

贈右衛將軍李安靜制

贈蕃維州城副使悉怛謀制

授元晦諫議大夫制

授段元遜哥舒嶠等官制問

授徐商禮部員外郎制

授狄兼謨兼益王傳鄭東之兼益王府長史制

授鄭朗等左諫議大夫制

授鄭裔綽渭南縣尉直弘文館制

授李丕晉州刺史冀代行營攻討副使制

授李丕汾州刺史制

授王元逵平章事制

門下古之命帥必重其名假三事之崇允萬夫之望

故韓信以丞相擊魏樊噲以相國伐燕克成茂功賞
抑有典成德節度使鎮冀深趙等州觀察處置兼克
北面行營招討澤潞等使金紫光祿大夫檢校司徒
兼鎮州大都督府長史御史大夫駙馬都尉雲騎尉
王元帥達生稟忠厚天資信誠竒正得於心機嚴莊
表於師律去病之畧無假繇吳翁歸之才實備文武
屬狡童逆命自固穴巢果能揚義聲以載馳繇直道
而先奮鋒逾駭電勢盛疾雷宣士卒上據層巒削成
垣壘下臨平壤盡見秋毫始擒伏莽之戎遽拔升天
之險尋又陳兵原野漸洗堯山摧困獸之鬪心挫鯨

卿之怒臂弃甲者萬計折首者千人先獻戎俘益彰
臣節則望王師之陳草木爲兵聞吾師之風椒蘭
比德顧其殘孽豈獲稽誅夫賞不逾時速人爲善雖
高敷五教已列三公而禹分其麾宜佩相印是用命
爾升于鼎司於戲昔吳起有大功者三不爲魏相竇
嬰破藩國者七未踐漢台豈非名器之重曷常虛受
爾其奮揚威武殲厥渠魁當感激而成功勿遷延而
玩寇服茲休命可不戒哉可檢校司徒同中書門下
平章事兼鎮州大都督府長史依前充成德軍節度
使鎮冀深趙等州觀察處置兼充北面招討澤潞等

使散官駙馬勳如故主者施行

授石雄晉絳行營節度使制

門下兵家之策戒在勢分故楚爲三軍破於英布光武料敵非劉尚之別營葛亮出師制魏延之異道專其大任方見成功斷自朕心授之戎律天德軍豐州四城都防禦本管押蕃落等使兼充晉絳行營諸軍副使銀青光祿大夫檢校左散騎常侍豐州刺史御史大夫上柱國石雄倜儻仗義沉密有謀近者被羽先登搴旗深入剪彼彙允碎其穹廬勇則冠軍威能振敵屬壺関逆命羽檄交馳命征虜奉公之心思成

李德公文集卷第四
三
一
臯過險之將嘉其壯節召自極邊旣而亞夫會兵馳
六乘之傳庶乎馬武力戰爲衆軍之鋒朕以彥佐早
升大將之壇久服上公之冕資其碩望任以指蹤鄧
禹之鎮關河功雖未遂羊祜之守吳會不必自行罷
戎後以會朝待寇寧而撫俗親授方畧慰彼蒸黎爰
擢奇才付予重事爾其再申兵法奮起士心去病無
以家爲勿邀天幸減官保於常勝寔在貴謀敬聽朕
言副茲寵寄可守本官兼充晉絳行營諸軍節度使
餘並如故主者施行

贈斐度大師制

敷堯之舊臣伯益顯庸於舜禹周之元老召公流美
於成康永惟其人是屬良相斐度始以謀策除害佐
烈祖之中興終以忠貞立朝毗累聖之鴻業經緯之
志華皓不衰功勳爛然圖史輝焯奸邪所忌魄旣于
時暨氛霧既開魚水將叶條風孰見其喜愠零雨皆
美其來歸未踐明廷遽嬰沉痼威鳳莫翔於舊沼虛
舟長往於夜川殂謝之初朋黨異義贈典不稱人情
鬱然屬告類上玄渙流大號載懷先正宜有褒崇寵
旣極於維師恩有加於在昔豈必望鄴侯之壘方念
茂功過梁道之祠乃思遺美以茲爲勸可不務乎

贈陳夷行司徒制

敕昔柳莊云亡輟宗廟之祭公叔旣歿表貞惠之名
前代所以追往悼懷飾終加禮未言髦傑宜峻舊章
故河中節度晉絳磁隰等州觀察處置等使檢校司
徒兼河中尹御史大夫陳夷行身爲儒宗位致宰相
言必體要行歸于周得壺遂之深忠持顏子之極樂
信能感物桃李所以不言思在無邪藜藿由其不採
朕纘承鴻業再授鈞衡陳群立朝道無適莫葛亮稱
物心匪重輕雖壯趾爲災躡步爲蹇朕之毗倚方回
始終任以建牙暫去巖廊之上射不穿札遂居將帥

之間方期永年爲我良翰遽聞淪謝痛悼于心是用
綏以衮章載之簡冊言念舊德尚懷黃髮之謀緬想
貞風爰舉素絲之節以資縟禮用慰幽魂

贈崔瑄左僕射制

敕孔子以類再之行首於四科漢代以荀陳之門方
於八凱乃眷時哲保茲令名用舉飾終之恩以抒殲
良之歎故山南西道節度使銀青光祿大夫檢校吏
部尚書兼興元尹御史大夫上柱國崔瑄誠明履正
粹密隣幾有子政之精忠得公綽之不欲禮樂二事
以爲身文仁義五常自成家範往以茂器列于大僚

屬賢相受誣廟堂議法用長孺之道以右正人微京
兆之言豈聞非罪既是魏其之直益彰王鳳之和莊
色于朝群公聳視讜詞不撓淑問攸歸歷踐名藩皆
有遺愛若常慎獨清則畏知爰自子衿迄于白首厲
翼之志終始不渝未陟台階實孤公望追榮左揆式
是優崇

贈王茂元司徒制

敕昔許穆公身歿於師贈以侯服王事加等春秋所
書言念勞臣終于盡瘁舉茲盛典用峻彝章王茂元
幼則服儒長能習史晚為邊將頗振軍聲近者元戎

啓行大旅臨境誓陟羊腸之險寧辭馬革之勞來必
挫鋒去者奪魄挑戰孤壘自揭高旌坐觀藝火之蓬
方解迎刃之竹必當樽俎制勝枕席還師勢如風霆
功在刻漏遽嬰沉痼莫展良圖伏彼之壯勇不衰呂
蒙之療護無及日未回於三舍星已旋於再周列諸
葛之鼓旗徐驅而返閔祭遵之車騎悼往則深亦旣
聞其綏復是宜加於袞歛勉爾群帥知予報功

贈右衛將軍李安靜制

敕昔班固有言何武王嘉區區以一篲障江河用歿
其身朕常以固作一代之典非所以垂法勸後也若

觀時以避禍量力以圖全則三綱之道幾於絕矣故
右衛將軍李安靜其祖太子少師綱寒譎大節炳於
青史安靜聿修厥德不隕令名往者產祿擅朝充躬
交亂每念王室殆於阽危不憚芳蘭之焚竟全孤竹
之志廣稱遺老坑感憤之詞苟不食言由忠貞之故
永懷臣節遠邁前良近者深戒有司下令遼東惟爾
苗裔靡有孑遺昔庭堅不祀滅文所歎仲宣無後魏
祖興嗟榮以先王之臣褒以揚名之典懋茲休寵用
慰冥魂

贈故蕃維州城副使悉怛謀制

敕兵家之法地有必爭遠則漢氏之得陰山匈奴慟
哭近則張愿之城河外朔邊底寧乃眷維州寔爲險
隘有金湯之固居襟帶之衝沒爲我疆垂六十載故
蕃維州城副使悉怛謀嘗解辮髮獻其壘垣議臣託
以和盟沮其誠款尋令東縛歸戮虜庭彼獲甘心且
無噍類昔常山臨代爲全趙之寶符河西絕羗斷西
戎之右臂棄茲要害用長寇讎至今蜀人言必流涕
豈陳湯之專命由匡衡之廢忠言念始謀久罹幽枉
爰加寵贈用慰貞魂

授元晦諫議大夫制

李德公文集 卷第四 七
敕昔汲黯薄淮陽守願出入禁闥補過拾遺則諫爭
之任實資諒直我求其比今得正人吏部郎中元晦
往在內廷嘗感先顧奮發忠懇不私形骸俯伏青蒲
至於雪涕數共工之罪不蔽聖聰辨垣平之詐益張
文德近因旌別邪正宰弼上言以魯公藏器莫如寘
革於左右漢后輯檻孰若列游於公卿是用命爾登
于文陛爾其副我寵擢不替初心勿沽小名以枉大
節勉服官業期於有終可

授段元遜哥舒嶠等官制

授徐商禮部員外郎制

敕朝議郎殿中侍御史內供奉上柱國徐商于公以
容駟高閎虞氏以升卿名子其所全活不聞大賢猶
誠感幽神慶流苗裔矧乃祖徃以淑問嘗爲理官屬
政在呂宗謀克王室將相陷辟忠良受誣而深念群
獄之寃固拒詔使分別楚囚之濫自履危機義激命
輕仁爲已任有是陰德宜覃後昆爾風度粹和文詞
溫麗列於清憲雅有貞標旣旌先正之忠爰舉賞延
之典勉修官業無替家聲可

授狄兼謨兼益王傅鄭東之兼益王府長史制
敕古者聖人之教子也皆妙選天下之端士以衛翼

五符公文集 卷第四
之漢代梁王好書則以賈誼經緯之才推明其志淮
陽好政則以玄成禮讓之節鎮靜其浮前王令猷石
伐良法况朕建立元子錫之粵區朱帥初開黃髮是
憲以兼謨慷慨納說有爰絲正席之忠以束之取捨
俟時有貢禹彈冠之操皆行不苟合誠無暗欺歷職
有聲居正無撓舉其素行擢在首僚尔宜廣德義之
風明孝愛之道俾其嚴於問寢敬不絕馳化與心成
中道若性服我休命可不慎歟

授鄭朗等左諫議大夫制

予欲左右前後皆得正人朝夕交戒傲予之闕所以

分左右而備箴諫也思見大儒骨鯁白首者爰論議
通古今喟然動衆心所以增其秩而厚其祿也朝散
大夫守諫議大夫兼弘文館學士上柱國鄭朗等皆
以真正守道列於左掖從容諷諫每竭嘉猷况朗璜
近因陛見乃能庭爭執以言責本於忠誠昔峻岷乘
危爰絲攬轡期門近出次况當車增主之明二臣之
力我求端士用繼前良期爾盡規致予無過拾遺左
右汲黯之願已諧祿賜愈多貢禹之誠當勵勉思厥
職無忝優思可

授鄭裔綽渭南縣尉直弘文館制

敕宣議郎前行京兆府參軍驍騎尉滎陽縣開國子
鄭裔綽昔漢武帝云有社稷之臣汲黯近之矣緬懷
先正實邁前良况兩代持衡皆有貞節守正持法遺
風凜然爾生於德門且服儒訓黃金不遺唯守於一
經白環比德方榮於四代嘉其勵行不隕令名俾從
丹地之遊佇繼緇衣之美可京兆府渭南縣尉直弘
文館散官勲如故

授李丕汾州刺史制

賈誼云守圉扞敵之臣誠死城郭封疆聖人有金城
者比物此志也若火焚岡而不改其貞風振野而獨

標其勁臨危自奮見義必爲得不寵以命爵列於上
賞忻州刺史兼御史中丞李丕幼而倜儻長負不羈
才耀奇而穎出智釋結而觴解禦侮是寄益德冠於
三軍騷動得人劇孟雄於一敵昔在爾祖志康國屯
翼龍而飛旣濡其雨露刑馬而誓已表於山河貽厥
孫謀載揚休問近者侵生參代盜起汾川保信都之
城不爲威惕戮邯鄲之使終以節全戎士間行奏章
押至閱其忠款可謂著明乃眷西河控于大厦文侯
舊壤干木遺風以節槩著者居之固其宜也勉圖嘉
績以保令名可

授李丕晉州刺史克冀代行營攻討副使制
敕晉謀元帥必有仇軍漢制出師皆立副貳所以重
戎事而肅王命也李丕頗有大慮常好奇功自為攻
拒之書尤遂揣摩之術淬其智刃斫未兆之機森其
禮干得備嚴之稱暨蟬蛻丹水鵬搏赤霄未及歲暮
累見誠節今以玉壁重地汾河要津俾換珪符用佐
樽俎庶乎易行而誘成苗賁之為不胄而驅效葉公
之入勉於盪寇副我知臣可

李文饒文集卷第四

李好文饒文集卷第五

會昌一品制集

詔敕上

詔書凡有敕字者使行無敕字者請翰林添獎飾語他皆做此

賜回鶻可汗書

賜回鶻書意

賜回鶻可汗書意

賜回鶻可汗書并宮主及九姓宰相詔書

賜太和公主敕書

賜背叛回鶻敕書

賜回鶻嗚沒斯特勒等詔書

賜回鶻嗚沒斯等詔書

賜思忠詔書

賜回鶻可汗書

敕我國家統臨萬寓列塞在陰山之南先可汗怒率
 本部達牙於大漠之北各安土宇二百餘年此天所
 以限隔內外不可逾越近聞為紇圻斯所敗加以虜
 荒國邑為墟屍僵道路今可汗稍收離散漸近邊城
 將議遠圖舍先文誥故茲命使宜聽朕言可汗累代
 以來推誠嚮國任者中原有誰助剪群兇列聖念功
 每加優寵寧國咸安二公主降嫁龍庭爰及先朝復
 以今公主絳好又以土無絲縷歲遺繡繒恩禮轉深

諸蕃稱羨久保誠信兩絕猜嫌但以國家舊章蕃漢
殊壤稍逾經制豈朕所安去歲嗚浚斯特勒已至近
昇邊將憤激便請祛除朕念其無主可歸且令安撫
今可汗旣立彼又降附便合率漸復舊疆漂寓塞垣
殊非良計又得宰相頡干伽思等表借振武一城權
與可汗公主居住中國之制與外蕃不同須守前代
規模祖宗法度昔漢朝單于乖亂呼韓欵塞宣帝送
單于出朔方雞鹿塞唯賑以米粟國初太宗皇帝命
李思摩建牙於漢南遺址並存事皆可驗未有深入
漢界借以一城與退渾党項微小雜種同為百姓實

亦屈可汗之尊貴亂中國之舊規若以未復本蕃或
欲別遷善地求大國聲援戢諸部交爭亦須率思歸
之人且於漠南駐止朕當許公主朝覲親問事宜儻
須應接必無所怙冀今被國從此輯寧豈不謂去危
就安轉禍爲福朕緣公主將可汗丹誠來告深感于
衷制置之間須存遠大故遣右金吾衛大將軍兼御
史大夫王會宗正少卿兼御史中丞李師偃馳往喻
懷爰定所居便申誓約神明是質豈可食言可汗並
保一心自求多福

賜回鶻書意 奉宣撰

朕想可汗公主以久修隣好累降嘉姻望我國家如
歸親戚朕每弘容納之意固無纖芥之嫌但以將相
大臣累陳公議以可汗代居絕漠臨長諸蕃名聲旣
雄部伍甚衆今逗留塞上逼近邊城百姓不安人心
疑惑耕種盡廢士馬疲勞朕二年以來保護可汗一
國內阻公卿之議外遏將帥之言朕於可汗心亦至
矣可汗亦須深見事體早見歸還所求種糧及安存
摩尼尋勘退渾党項劫掠等事並當應接處置必遣
得宜惟是擬借一城自古以來未有此事天地以沙
漠山河限隔南北想蕃中故老亦合備知只如長安

東有潼關西有散關南有藍田關北有蒲關今四海
一家天子所都猶有限隔况蕃漢殊壤豈可通同且
天下者高祖太宗之天下朕守祖宗成業常懷兢畏
豈敢上違天地之限中隳祖宗之法每欲發一號施
一令皆告于宗廟不敢自專所借一城理絕言議想
可汗便須息意勿更披陳其餘令楊觀專往視喻朕
意

賜回鶻可汗書意

楊觀至覽表欲求糧食牛羊糧食已許自己馬價絹
就振武和糴三千石緣中國以農為本最貴耕牛百

姓所蓄無多常斷屠殺羊則產於北土不出中華惟
塞土蕃渾各有畜牧朝廷未嘗徵率務使安存今之
所求難允米意又所請束縛盟沒斯送歸者盟沒斯
比自投邊將屢狀誠款自本國破亡之初奔迸先至
塞上不隨可汗公主已二年慮彼猜嫌自懷憂懼
窮迫歸命望朕保持未嘗有交構之言離間兩國前
可汗已緣失制馭之道無兼愛之仁侵擾諸蕃肆為
暴虐所以親屬內叛部落外離國破家殘實由於此
今可汗失地遠客危難之中允湏追悔前非以安反
側若又仁愛不至骨肉相殘可汗左右信臣誰敢自

保朕統萬國非止一番未附者頃務懷柔歸誠者因
宜存撫僮狗可汗之意殊乖覆育之恩今已特許歸
降止於存其種族必不別有任使授以腹心在可汗
不失恩慈於朝廷免虧信義豈不兩全事體深叶良
圖况前代以來盡有故事漢朝呼延邪單于款塞其
下大將烏厲屈烏厲温敦並來降附漢宣帝封以列
侯又國初頡利可汗之破敗也降者甚衆酋豪首領
至朝廷皆拜將軍僅百餘人無不撫納想可汗深明
朕意勿更再論摩尼教天寶以前中國禁斷自累朝
緣回鶻敬信始許興行江淮數鎮皆令闡教近各得

本道申奏緣自聞回鶻破亡奉法者因茲懈怠蕃僧
在彼稍似無依吳楚水鄉人性器薄信心既去翕習
至難且佛是大師尚隨緣行教與蒼生緣盡終不力
爲朕深念異國遠僧欲其安堵且令於兩都及大原
信嚮處行教其江淮諸寺權停待回鶻本土安寧即
却令如舊

賜回鶻可汗書并公主及九姓宰相詔書

朕自臨寰區爲人父母惟以好生爲德不願黷武爲
名故自彼國不幸紇圻斯所破來投邊境已歷歲年
撫納之間無所不至初則念其飢歉給其糗糧旋則

知其破傷盡還馬價前後遣使勞問交馳道路小小
侵擾亦盡不計今則可汗尚屯近塞未議還蕃朝廷
大臣與四方節將皆懷疑忿盡請興師雖朕切務含
弘亦所未喻日昨數使卻回皆言可汗只待馬價及
令交付之次又聞所止屢遷或侵掠雲朔等州或讐
掣羗渾諸部未知此意終欲何如若以未交馬價且
近塞垣行止之間亦宜先告邊將豈有倏來忽去遷
徙不常雖云隨逐水草動皆逼近城柵遙揣深意似
恃姻好之情每觀蹤跡實懷馳突之計况昨到橫水
柵下煞戮至多蕃渾牛羊豈恣驅掠黎庶何罪皆被

傷夷所以中朝大臣等皆云回鶻近塞已是違盟更
戮邊人實乖大義咸願因此翦逐以雪殂謝之寃然
朕志在懷柔情深屈已寧可汗之負德終未忍於壘
災石誠直久在京城備知仁一本作人心憤惋發於誠懇
固請自行嘉其深見事機所以不能違阻可汗審自
詢問速擇良圖無至不悛或貽後悔

賜太和公主敕書
奉宣撰

敕姑遠嫁絕域二十餘年跋履險難備罹屯苦朕每
念於此良用惘然恭惟太皇太后春秋已高慈愛深
厚比者望姑朝謁再叙悲歡倏已歲暮寂無音耗想

姑見舊國之城邑能不銷魂望漢將之旌麾必當流涕今朔風旣至霰雪已零絕國蕭條固難久處旃墻芻幕何以禦冬肉飯酪漿且非適口朕撫臨萬寓子育群生一物未安終食三歎况姑累年漂泊何日忘懷想姑高明必是懸鑒姑承宗廟之餘慶爲三室之懿親先朝割愛降婚義寧家國謂回鶻必能侮禦安靜塞垣使邊人子孫不見兵革射獵者不敢西向畏軒轅之臺今回鶻所爲甚不循理蕃渾是朕之人百姓牛羊亦國家所有因依漢地遂致蕃孳回鶻託以私讐恣爲侵掠每馬首南向姑得不畏高祖太宗之

威靈欲侵擾邊疆姑得不思大皇太后之慈愛為其
國母足得指揮若回鶻能不稟命則是棄絕姻好今
日以後不得以姑為詞若恃我為親稟姑教令則須
便自戢歛以繼舊歡想姑以朕此書喻彼將相令其
知分更不徇非塞外祈寒且無絲纊朕每御裘服則
思彼未授衣豈可回鶻請張遂忘親愛今寄冬衣若
干具如別錄

賜背叛回鶻敕書 奉宣撰

近數得邊將奏報知卿等本國自有離亂可汗遇禍
雖未委虛實良深震悼我國家與卿等本國代結姻

好又爲親戚協德同心常爲諸蕃所羨故得邊候不
聳封疆晏然卿等忽領師徒漠南屯集又數至天德
侵掠頗擾邊人聚師無名忠義俱失旣乖舊好良用
憮然若卿等本國所立新主非可汗至親人心不從
擾亂未定卿等只合自申方畧竭效忠誠安靖本蕃
以圖勲績亦合遣使告朕具述此心若新立可汗是
中國至親人已歸附卿等便合早自相率保國寧家
與可汗協心以修舊好豈得寄命塞上又勞師人朕
緣與卿本國情義至深事同一體又緣公主在彼未
知存亡故遣使臣魏暮往諭朕意卿宜備陳誠款不

得虛詞無禁戢師徒勿爲侵軼近聞天德遊奕軍將
曾有交鋒卿等旣犯塞垣亦是邊將常事今已各令
諸鎮不許交兵卿宜曉諭部落各令知悉

賜回鶻嗚沒斯特勒等詔書 奉宣撰

勅回鶻嗚沒斯特勒那頡啜特勒頡干伽思於解亦
阿耽于思莫賀達干宰相伊難朱密伽諦畧摩咄將
軍諦畧等天德軍迺所奏表至再三省覽憂屬良深
彼蕃自忠義毗伽可汗以來代爲親隣連降愛主恩
禮持異古今莫及君臨萬國撫育殊方苟有未安則
宜來告况特勒等乃祖乃父歸誠累朝昨遣嗣澤王

溶吊冊先可汗回始聞卿國中喪亂諸部乖離抹患
卸隣豈忘令典方圖鎮撫以命使臣今又知堅昆等
五族深入凌虐可汗被害公主及新可汗播越他所
未歸城邑特勒等力不能制思存遠圖相率遁逃萬
里歸命又知欲奉公王朝覲忠謀不從已踰大漠之
南同款五原之塞茲此單使布其赤心言念艱危惻
然軫歎料卿等皆英酋貴族羈寓沙場懷土之情如
何可處豈非欲討除外寇匡復本蕃抱此至忠託於
大援但緣未知指的難便聽從又慮邊境守臣見卿
忽至或懷疑阻不副朕心故遣鴻臚卿張賈馳往安

撫朕旣獎卿忠款報以信誠雖隔塞垣已如相見卿
須深明朕忠盡吐所懷一一言於使臣令其速還聞
奏佇聞誠願續有指揮必當副彼急難固不惜於事
力勉於謀度用保忠勲秋熟卿及部下諸官并左相
阿波兀等部落黑車子達怛等平安好遣書指不多
及

賜回鶻嗚沒斯等詔 奉宣撰

敕回鶻嗚沒斯特勒那頡啜特勒悉勿啜特勒烏離
思特勒赤心宰相等張賈等回知卿等欲遠赴闕庭
自申忠款眷言深志豈忘于懷聞卿等本國頃因飢

荒遂至離散親屬內叛諸部外侵新立可汗猶未安
定既是國中所奉則爲卿等君親古人云未有仁而
遺其親者義而後其君者想卿等本心必思推戴况
回鶻代雄朔漠威服諸蕃今已破傷足堪悲憤若皆
自爭雄長不顧其君各據一隅必更衰弱深慮從此
之後爲諸蕃所輕與卿等本國代結姻親久修隣好
每念於此良用惻然與卿等爲謀須務遠大莫若自
相率勵同奉可汗興復本蕃再圖強盛朕欲召卿赴
闕親諭此懷又恐可汗聞知謂朕幸其艱危因有招
納蓋欲深全國體兼爲卿等避嫌以此思之難遂於

請卿等宜早歸本國不更滯留卿等表請噐甲朕君
臨萬國非止一蕃祖宗舊章不敢逾越國家未嘗賜
諸蕃噐甲卿等亦合備知若一處開恩必自茲援例
朔州般次舊例須待可汗遣駝馬迎聖方令進蒞可
汗信使未至難於遣行今有賜物具在別錄以卿等
率先向蒞特示優恩緣新立可汗未受朝廷冊命數
降使至卿等部落亦恐非宜所有賜賚止於此度想
卿等明識深諒朕懷便令高品魏敬休宣諭想宜知
悉

賜思忠詔書 奉宣撰

呂衛等至知卿與可汗不能戢下頗擾邊疆既告諭
不浚須兵勢驅逐卿忠誠奮發願立竒功請退渾沙
陀等部落合勢及戰馬噐甲等並已允卿所奏各有
別敕處分今令左衛將軍何清朝蔚州刺史契苾通
分領蕃渾部落取卿指揮朕已切戒何清朝等令其
協盡心力副卿忠誠進取之時一切取卿方畧卿宜
每事與弘順等商量審度事機勿爲輕進但得可汗
抽退不敢稽留塞上安寧卽是卿之勲力必不可落
其奸計以損國威兼令高品駱遂泰權監行營將士
卿與之籌慮續續奏聞

五卷終

李文饒文集卷第六

會昌一品制集

詔敕中

黠戛斯國號皆依蕃書譯字所以不同商量冊命時奏請依價相公華夷述便以黠

戛斯為定

與紇圻斯可汗書

與黠戛斯可汗書進狀

與黠戛斯書意進狀

賜石雄及三軍敕書

賜澠州軍人敕書意

賜党項敕書

賜劉沔張仲武密詔二

本朝公文集卷第六
賜張仲武詔

賜何重順詔

賜張仲武詔意

賜彥佐沔茂元詔

賜彥佐詔意

與紇圪斯可汗書 奏宣撰

皇帝敬問紇圪斯可汗時屬載陽想彼休泰朕撫臨
萬寓子育群生思致洽和用臻至理將軍踏布等祖
等至鑒表具之可汗生戴斗之鄉居寒露之野智謀
精果材志沉雄威動龍荒聲馳象魏眷言丕績深用

注懷我太宗文皇帝聖德高於百王英材軼於千古
內定諸夏外服百蠻貞觀四年西北蕃君長詣闕頌
頌請上尊號爲天可汗是復降璽書西北蕃君長皆
稱皇帝天可汗臨統四夷實自茲始暨貞觀六年太
宗遣使臣王義弘至可汗本國將命鎮撫貞觀二十
一年可汗本國君長身自入朝太宗授左屯衛將軍
堅昆都督至天寶末年朝貢不絕則可汗祖先已受
我國家恩德計可汗國中遺老必自流傳朕纘奉不
圖思申舊好比聞天寶以後爲回鶻所隔久阻誠款
回鶻自謂天驕罔修仁義肆行殘忍凌虐諸蕃知可

汗代爲仇讐果能報國滅其國邑皆已立君驅彼酋
渠盡逾沙漠茂功壯節近代無儔回鶻當中國伐叛
之時嘗展勳力列聖嘉其大順累降媼親今失國逃
亡寄於塞上只合早歸窮款受朕撫循而乃轉自鷓
張益懷狼顧在陰山之外誘惑小蕃乘我無虞卽來
侵掠恣爲邊患今已四年朕大徵甲兵久欲除翦比
令幽州太原兩道節度使皆克招撫以示綏懷望其
悛心猶務含育而凌蔑公主頻擬傷殘馳突邊城敢
謀盜竊近太原節度使劉沔不勝其忿潛出偏師乘
其譟張使襲牙帳虜衆大潰穹廬盡焚元惡傷殘脫

身潛竄已取得太和公主卽至闕庭回鶻殘兵不滿
千人散投山谷旬日之內必合梟擒朕再見公主良
欣深慰可汗旣爲讐怨須盡殘夷儻留餘燼必生後
患想遠聞慶快當愜素心聞可汗受氏之源與我同
族漢北平太守材氣天下無雙結髮事邊控弦貫石
自後子孫多習武畧代爲將門至嫡孫都尉提精卒
五千深入大漠單于舉國來敵莫能抗威身雖陷沒
名震蠻貊我國家承北平太守之後可汗又是都尉
苗裔以此合族尊卑可知昨聞太和公主爲可汗衆
兵所得可汗以同姓之國使遣歸還有以見可汗秉

禮義之心重親隣之好朕深用感歎至于涕零公主
尋爲回鶻劫奪久不歸國可汗所以使臣皆被誅戮
朕言念傷痛至今不忘昨見可汗表求訪公主使公
主上天入地必須覓得今邊將憤惋已立奇功回鶻
罪人計日可致卽當顯戮以謝可汗况回鶻夷滅種
族必盡與可汗便爲隣國各保舊疆繼好息人事同
一體從此邊陲罷警弓矢載橐必當諸部服從皆懷
徒羨知我兩國未爲宗盟想可汗明智自有良筭故
令太僕卿兼御史中丞趙蕃持節充使以眷深誠質
於神明用存大信朕言不貳可不勉歟又自古外蕃

皆須因中國冊命然可殫壓一方亟欲垂命可汗時
加美號緣未知可汗之意且遣謝懷行趙整回日別
命使展禮以申和好彼國將相並存問之遣書指不
多及

與黠戛斯可汗書

皇帝敬問黠戛斯可汗將軍諦德伊斯難殊至覽書
及領所獻馬百匹鵠十具悉皇帝聰明天稟英姿
生質恐德未徧覆愧漢宣兼臨之盛况與彼國壤隔
內外非正朔所加禮既不施政豈宜及但以惜可汗
宗盟之國顧保先名爲可汗弘遠之謀須除後患所

以具古今禍福往諭至懷昔呼韓單于以郅支尚存
國難未靖稱蕃事漢福及子孫之後漢單于比以大
父體漢而安繼襲其號上書款塞永願藩蔽漠南遂
致朔塞底寧烽燧永息近則回鶻結大國之援雄長
北蕃諸部率從莫敢不服一隅安樂有有餘年此事
昭然可汗所覩况今回鶻種類未盡介居蕃漢之間
爰及黑車子久畏其威素服其信慮彼再振常持兩
端須令小蕃知朕親厚可汗棄絕回鶻實在和好分
定內附約盟則和計奸謀無由而入故欲顯加冊命
昭示萬方况登里可汗回鶻舊號是國家頃年所賜

非回鶻自制此名今回鶻國已破亡理當嫌避朕以
可汗先祖往在貞觀身自入朝太宗授以左衛將軍
堅昆都督朕思欲繼太宗之舊典彼亦宜遵先祖之
明誠便以堅昆爲國施於冊命更加美號以表懿親
况堅者不朽之名昆者有後之稱示不忘本豈不美
歟朕昨令禮部尚書鄭肅等與彼使臣面陳大計溫
作合將軍等皆諭朕旨願言結成豈必契徑路之金
舉留犁之酒保茲誠信固在厥初頃者回鶻初至塞
上請國家精兵十萬送至漠北漸歸本蕃又請借漢
界一城養育疲羸以圖興復朕以可汗之故盡不聽

從今回鶻是國家叛臣爲可汗讐敵須去根本方保
永安是天亡之時易於攻取古人云天與不取反受
其咎可汗須乘此機便早務芟夷回鶻未滅以前可
汗勿以飲食爲甘弋獵爲樂勵兵秣馬不可暫閑所
恨隔在諸蕃國家難於同力儻更近塞豈復稽誅又
恐餘孽歸降可汗未能盡戮納有罪之衆受逋逃之
臣儻收吾憎必開邊隙則是蕃養虺毒自生勵階前
年回鶻宰相等向漢使云李靖擒頡利後國中只有
三二十人便卻興復郅在危困尚爾張皇可汗深察
此言豈得不慮又聞合羅川回鶻牙帳未盡毀除想

其懷土之心必有思歸之志速要平其區落無使子
遺旣表成功彼當絕望可汗已摠積年之憤自爲一
代之雄至於居處服章皆悉變革焉得安於所習姑
務因循則何以震耀北方殫壓諸部朕撫有中夏愛
育生靈常恐百姓未安一物失所豈願更廣威畧遙
制要荒但緣與可汗方保和盟義同憂樂纖微之事
皆欲備言想可汗與將相等謀副茲誠意此使到日
必諒朕心卽宜速遣報章此當遣重臣冊命夏熟想
可汗休泰將相以下並存問之遣書指不多及

進所撰黠戛斯書狀二

右今月十三日於閣中面奉聖旨令撰書進來者臣請待鄭肅等與語了撰述今撰訖謹進上

進所撰黠戛斯可汗書狀

右奉宣令臣與書內添堅昆事者緣未審知黠戛斯的是堅昆之後恐須粗言梗槩未可明書今已依宣添改其間有詞意未盡處亦更加添臣學識空虛文理淺近再陳嚴扈伏積兢惶謹連封進

賜黠戛斯書

進狀

奉宣撰

皇帝敬問黠戛斯可汗將軍諦德伊斯難殊至覽書并白馬二疋其悉可汗降精斗極雄朔漠以偁君稟

耀麾頭分天街而建國特負英雄之氣夙推統御之
才眷想嘉猷載深寤歎來書云溫件合將軍歸國後
漢使不來溫件合去日朕書具云速遣報章此當遣
重臣冊命自是可汗未諭此意報答稍遲此則尋欲
遣使只是延望來信又云金石路已隔絕蓋爲山川
悠遠未得自與可汗封壤接連非是兩國之情猶有
阻隔想可汗明識無復致疑又云兩地遣書彼此不
會且書不可以盡言言不可以盡意况蕃漢文字傳
譯不同只在共推赤心永保盟好豈必緣飾詞語以
此交歡每欲思惟先思好意不更疑惑便是明誠又

云欲除却兩楹間惡刺此一事最是嘉言緣回鶻雄
據北方代爲君長諸蕃臣伏百有餘年今可汗掃其
空廬大雪雙耻功業旣高於前古威聲以振於北方
固當深務遠圖豈可更留餘燼黑車子不度德量力
敢保寇雙言則是輕侮可汗獨不嚮化此而可忍孰不
可容况可汗前來云求訪公主使上天入地必須覓
得今若舍而不問何以取信朕懷想可汗乘彼盛秋
長驅精騎問回鶻逋逃之罪行黑車子後服之誅取
若拾遺後無再舉從茲盪定豈不美歟來書又云送
公主到彼無一語來緣公主纔離可汗五日便被回

鶻劫奪所遣來使盡被殺傷公主二年之中流離沙
漠事已隔遠所以不再叙言然趙蕃去日已具感悅
之心足表殷勤之意又聞今秋欲移就回鶻牙帳滅
其大國便保舊居足使諸蕃畏威回鶻絕望稍近漢
境頗謂良圖所云請發兵馬期集去處緣黑車子猶
去漢界一千餘里在沙漠之中從前漢兵未嘗到彼
比聞回鶻深意常欲投窟安西待至今秋朕當令幽
州太原振武天德緣兵四鎮要踏出兵料可汗攻討
之時回鶻必當潛遁各令邀截便可梟擒此是一本無是
字軍期湏合符契想可汗必全大信用叶一心諦德

李德公文集 卷第六
伊斯難殊朕已於三殿面對兼賜宴樂並依來表不
更滯留朕續遣重臣便申冊命故先達此旨令彼國
明知冊命之禮並依回鶻故事可汗爰始立國臨長
諸蕃須示鄰壤情深宗盟義重以此鎮撫誰敢不從
宜體至懷共弘遠畧春暖想可汗休泰將相以下並
存問之遣書指不多及

進所撰黠戛斯書狀

右奉宣令臣撰進來者臣詳其表中情款一一報答
盡不闕遺兼不爲文言遣其易會緣冊命時須令其
稱蕃事須云冊命之禮並依回鶻故事若須更有邀

約即待朝廷命使日別賜敕書稍爲允愜謹緣上進
未審否

賜石雄及三軍敕書

敕石雄晉絳密邈王畿地當襟帶自卿與將士等扼
其險要勇冠諸軍捍彼奔衝爲吾砥柱每尅期深入
屢挫狂鋒批亢擣虛導窾遊刃未言勲績豈忘於懷
昔商伐鬼方三年乃剋周公東征三年不歸憲宗平
淮西文宗定滄海士不解甲或三四年想卿等久在
戎行心經此役且士之生代本爲功名仗義從軍固
當殉命居平則孝養父母成長則子孫衣食所資無

非國力有事則投袂而起負甲先登撫養之息惟此
爲報今者終近半歲未日勞師功在垂成往無不捷
將士等各宜感勵成此功名上黨旣平天下無事從
此永安家室不復征行近者楊奔首爲猖狂扇惑亂
卒今則身膏齊斧戮及妻孥生爲不忠之人死爲負
義之鬼身名俱滅可不痛哉諸部旣安王師益振乘
此聲勢必殄餘妖故令中使宣慰兼賜優賞鄉等使
湏鼓行而進徑入賊界下營從此駐軍速圖進取勿
使功業歸於別帥爵賞在於他人勉務杜圖副茲厚
遇想宜知悉

賜潞州軍人敕書意

劉稹乳臭驂童未有所識皆是郭誼王協幸其昏弱
矯託軍情妄獻表章欲求繼襲志在肆行禍福自擅
兵權侮感從諫之恩誓同生死及見山東三郡皆已
歸降事迫勢窮歸惡劉稹令其一門受戮便欲自取
寵榮不義不忠古無其比朕以誘陷劉稹皆是此二
人販賣圖全義難容捨已令澤潞冀氏兩路遣軍只
取郭誼王協及同惡之類其他軍人一切不問仍各
有優賞後從敕處分如兩道兵馬未到以前有忠義
之士先非同惡者能自擒俘郭誼等所與優賞並同

斐問王釗例處分已詔石雄王宰到彼不令侵擾軍
人百姓如秋毫有犯便按軍法各宜勉思機計共保
忠誠勿受姦人扇動妄生疑忌互相告報咸使明知
扇動一作扇惑妄生一作妄懷

賜党項敕書

敕自爾祖歸款國家依附邊塞為我赤子編於黔黎
牛馬蕃孳種落殷盛不侵不叛頗效信誠比聞邊將
不守朝章失於綏輯因緣征斂害及無辜念爾遠人
莫知控告特命朕之愛子實惣元戎所冀群師聽命
而不敢自專諸部懷怨而有所披訴奉我憲令以保

和寧如聞莫顧私恩遂懷憑恃攘奪不避於官物驅掠罔憚於平人擅興甲兵恣行攻劫豈有朝廷內地輒此鴟張道路阻艱商旅殆絕朕便欲詔命諸鎮同力勦除深慮玉石難分善惡同斃今再爲條例各使得宜却令節將指揮許其處斷如有濫政乘公平並遣巡院奏聞朝廷必爲申理如或不知恩貸猶敢猖狂國有典章必難容捨故茲宣示當體朕懷

賜劉沔張仲武客詔

敕劉沔等自回鶻本國殘破寄命北邊朕以其艱難之時常效勲力平寧之後結以姻親義切懷柔情深

兼愛亦既轉粟賑救降使撫循示信推恩朕無所愧
而狼顧塞上鼠守雲中聞有備雖暫移營稍隙復
來近塞察其情計殊未歸還朕祗荷丕圖撫臨萬寓
守祖宗之法制思黎庶之義安豈可蓄虺兗於塞垣
養蠱毒於懷袖乘其馳突必欲驅除昔晉侯報楚之
功避子玉於三舍然明一本作先車背秦之惠覆孟明於二
嶠安國庇人大義斯在卿宜遣使告諭明示朕懷如
或遲留尚爲巧詐卽須埒角相應臨以兵威勉務良
圖副委茲遇

賜張仲武詔

敕仲武周璵至省表知可汗猶有疑懼近日移營卿
自愬戎麾累剪狂寇英威所振桀鰲皆從仁義所綏
降附相繼昨者可汗來依塞表已在穀中豈謂黠虜
之奸心尚懷翻覆柔服之際又此遁逃遠揣虜情必
終難保信昔去病深入大漠方殄獯戎近李靖再襲
穹廬始擒頡利况卿伐謀制勝才出古人宜選練勁
兵掩其無備使呂嘉懷貳而受首孟獲雖縱而必擒
特立竒勲永光千古朕已令劉沔旋布却入東徑候
卿本道成功即令歸鎮經畧之事全以付卿須及塞
草未青虜騎方困一舉便剋使魚豸遺卿先葬馬步

一萬人於大界原防戍今緣可汗入卿掌握已在網
羅豈得更屯精兵守無用之地即宜追赴本道同力
剪除緣卿師旅至多費用尤重其出界糧料已令所
司依前支給卿宜勉於盡敵以副朕懷

賜何重順詔

與王元達詔同惟
向前句九詞不同

敕重順卿代傳忠孝志在功名朕每用注心豈忘終
食况卿先父當太和之際已有誠款思靖隣封臣節
昭彰遐邇稱歎澤澍一軍素聞忠順從前命帥皆是
儒臣穆宗以劉悟有歸闕之功委之心膂令居善地
鎮靖一方及殂謝之時不能堅守臣節遂使三軍上

請以幼子惣戎其時朝廷因循姑務安靖授以旄鉞
事蓋從權今從諫疾急所侵頗聞繇懌昨士麻奏至
大將及下復請劉稹權知軍務朕深惜劉悟一門自
夫逸懷以來累代忠節今劉稹又欲自擅隳其門風
當撤瑟之辰罔聞憂戚在嘗藥之際便窺兵權尤爲
臣子所當共奔卿宜訓練戎旅嚴固封疆俟彼軍中
有變便湏遣書告諭令其三軍送劉稹歸闕請朝廷
推新擇帥朕必選舊德重望委之撫循劉稹厚加爵
賞別有任用如妄自制置邀求寵榮國家典法亦難
寬宥澤潞一鎮與卿事体不同勿爲子孫之謀欲存

李德公文集 卷第六
十三
輔車之勢但能顯立功效自然福及後昆勉務良圖
副茲委遇高秩厚賞無所恪焉

賜張仲武詔

卿智畧挺生忠誠特著每陳章奏皆契朕心言念壯
猷無忘寤寐今緣從諫疾病頗以深緜深慮將校異
謀妄有制置太原地連河朔城府空虛已詔劉沔旋
師却歸本鎮又緣回鶻餘燼未滅塞上須有防虞藉
卿長才列於禦侮邊境戎事悉以副卿宜深體朕懷
勉弘方畧控馭朔塞爲我長城當使早殄餘妖永清
絕漠副茲委遇以保功名

賜劉沔茂元詔

敕古者涼風至白露下天子乃命將厲兵以征不義
申令誓衆今則其時况募收司刑助天而肅殺金星
動色應節而糴芒咨爾帥臣爲予之佑得不敬順天
道振揚兵威近有詔書令取七月中旬五道齊進王
元逵久蓄忠憤爲國除殘率兵先諸軍深入其險阻
拔宣務要害之壘絕堯山應援之兵旣以扼咽必當
破膽而卿不務疾雷先奮欲以歲月勝彼凡爲將帥
誰不樂此豈祭遵之安重致欒伯之遷延且不副於
詔書以後期於成德若未可深入亦要先聲宜早進

軍速臨賊境樹立城柵羅列旌旗深溝高壘勿與之
戰兼擇猛將時出奇鋒令彼一方疲於奔命如此足
分賊勢益壯東師昔趙充國征羗漢宣帝詔曰太白
出高用兵深入敢戰者吉卿宜思古名將早立奇功
無執狐疑之心勉務鷹揚之舉國之大事賞罰必行
當體朕懷勿稽詔命想宜知悉

賜彥佐詔意

卿累當大任實愬元戎既行節制之師須務綏懷之
德養威持重屬在於卿至於負羽先登塞旗深入本
非將帥之事當假拳勇之材况自古出師皆有副貳

臨難則權以相濟料敵則智以相資故韓信伐趙張
耳爲貳吳漢征蜀劉尚副軍國朝以來多用此制李
勣之取平壤參以道宗李靖之襲陰山副之公謹近
者劉沔全師北伐按甲雲州委石雄先鋒太破回鶻
朕以石雄近摧醜虜已著威名久在徐州諳練士卒
今輟自天德與卿副湏諸軍卿宜選徐州陳許精兵
三千人便令先入勵其猛氣必立奇功倘能挫覆妖
巢亦自勲歸元帥勉於率下深務協心体朕至懷以
圖丕績

李文饒文集卷第六

開化圖書館

Kaohua library

李文饒文集卷第七

會昌一品制集

詔敕下

賜石雄詔

賜劉沔詔意

賜李石詔意

賜王元逵詔意

賜李石詔意

賜王宰詔意

賜張仲武詔意

賜劉沔詔意

李文饒文集卷第七

一

賜王宰詔意

賜石雄詔意

賜王元逵何弘敬詔意二首

賜汾邊諸鎮密詔意

停歸義軍敕旨

置孟州敕旨

李回宣慰三道敕

賜王宰詔意

賜石雄詔意

敕石雄古者有必勝之將無必勝之人欲立奇功實

在謀師朕所以求鷲鳥於累百得飛將於魚雙總率
諸軍以臨賊境况卿受尺一之詔初無辦嚴盤丈八
之矛果能盪寇眷言勛績深注余懷近聞從諫時百
姓相驚云卿以七千兵至數告於衆魄兆於人今天
策向晨已及成軍之候龍驤建旆必叶渡江之謠舊
史昭然冥符可驗加以天道在乎西北順歲有功福
星煥乎龍庭爲國大慶勉弘方畧契此休徵昔鍾會
以二十萬兵頓於劍閣鄧艾纒一萬衆直抵成都只
在決機豈由衆寡知卿能辦故諭此懷然聞卿每自
履軍常先士卒既有輕敵未足耀奇朕借卿一舉之

功以定必擒之計至於小陣不可自行魏武帝嘗戒
夏侯妙才曰爲將當有怯時不可但恃勇也當以勇
爲本行之以智計但無知任勇一匹夫敵耳張遼單
身入昌稀家魏武責曰此非大將法今卿爲萬人之
帥啓千乘之行舉必責謀動資持重報國在於平賊
不在輕身爲將本於坐籌寧勞陷陣卿宜以朕之戒
嘗自書紳務建功名副茲委遇

賜劉沔詔意

緣卿二年在外城府久虛今殘虜未平南北皆有戎
事欲令卿却歸本鎮應接兩隅行營諸軍未知所付

聞王逢頗有武用卿所素知今已追赴大原欲令充
本道行營都知兵馬使又緣例偏裨日近官秩尚卑
指揮諸軍未即宜稱今緣石雄王宰皆欲進兵得卿
一軍齊入足分賊勢卿宜審自籌度歸本鎮後在朝
及側近武臣誰人堪付行營兵事宜密狀具一兩人
進來如卿離行營後兵力事勢深入未得亦須審具
事實聞奏不要隱情今取決於卿切在審詳

賜李石詔意

訪聞近日賊中轉更窳蹙自相殺戮人心不安即目
軍權多在郭誼因此誘動必應事機李丕是郭誼親

密尤合相信卿宜暫追赴使令與郭誼書諭以利害遣其自圖劉稹早務歸降倘效誠款必重酬賞卿宜面看李丕手疏兼令便自封題分付王逢遣密作計召軍人百姓送入澤潞其書草卿宜封進

賜王元逵詔書

材幹筋革出自江淮除進奉之外並敕令所禁蓋以有國之制固須立防朝廷法度理當畫一卿國之懿威時之信臣方進勁兵坐清殘孽誠宜假以利器壯軍威朕之於卿固無愛惜但以河朔數鎮事体應同若一度賜卿必傳相援例恩信不一非撫御之遠圖

賜與頻繁隳朝廷之舊制卿是朕之心腹必合樂守
憲章故示至懷想當知悉

賜李石詔意

省所奏劉稹令賈群齊李恬書與卿將兵屬同赴闕
庭兼請歸葬東都事宜具悉比者河朔諸鎮惟淄青
變詐最多劉悟隨來舊將皆習見此事察其情偽深
要精詳蓋緣四面王師尅期

石

雄王宰已據天井卿當道又得石會旣失重關之險
將弋在宄之妖鎮衛勁兵皆臨境上城孤援絕情計
已窮所以密將款詞歸命上相恐是偷安旬月潰緩

王師稍得自完復來侵軼况饋運日有所費春作漸已及時勞我師徒恐非至計卿與其要約令面縛來降卿即馳至界首親自受納苟不如此且須進軍必不得因此遷延令其得計仍不得先受章表便與奏聞今賜與劉稹書白想宜知悉

賜王宰詔意

省所奏差張公輔入澤州潞州亦粗得賊中軍情若許招誘乞賜詔命事宜具悉劉稹喪父之初已拒朝命旋又焚蕪晉絳廬舍侵逼萬善孤軍罪惡貫盈言詞甚悖自卿全師壓境頻挫其勢尋得天井重關下

臨高平危壁邇來頗自知惧方獻僞詞然天奪其心
鬼迷其志宋人已病不告析骸之情朱鮪乞降曾無
面縛之效尚聞張皇叛卒覬望鴻恩不戢群兇徒云
繼襲想卿忠憤必志集夷况自去年以來頻奄畢今
又福星煥燿正臨天馬四東漢書云畢爲天網網羅不
善之人房爲明堂方集重華之慶懸象昭牝前史所
書朕奉天道以行誅守祖宗之成法顧茲小寇終不
貸刑亦知晏實是卿之愛弟將申大義在抑私懷豈
無鷓原固慎名噐今料其初通信使必謂卿且駐軍
想彼叛徒猶希洗雪乘此討襲必有奇功韓信襲歷

下之軍李靖翦陰山之寇皆因敵心懈弛故得機討
不遺想卿久習兵符備詳虜態便須覆其巢穴不可
更有招携劉稹縱有表章請自面縛不得便自報答
亦須奏聞當務遠圖勿拘小信速宜攻討以副朕懷
想宜知悉

賜張仲武詔意

昨以李石文吏不可自赴行營令在太原應接戎事
緣親兵在外城府空虛楊弁糾合征師衆纒一旅迫
逐主帥擅領兵權尋詔近地行營量抽兵馬便令翦
撲計日梟夷緣鎮州地接土門最爲便近已詔元達

出師五千人馬向南諸軍聲援顧茲小寇未足勞卿
大軍緣何清朝下河水官健曾經楊弁將領久與亂
軍同處恐其自思家屬因此搖心宜速與卿本道都
頭密意動靜與清朝計會犄角相應如萬一清朝官
健禁戢不定抽歸太原已令把絕鴈門遏其歸路卿
便湏出軍掩襲勿遣漏失兇徒每事與清朝商量務
從權便應機在速不更待奏聞

賜劉沔詔意

敕自古出師莫重謀帥李廣臨塞威動殊鄰吳漢理
軍允如敵國舉茲制勝方見成功往者羯胡亂華伊

洛未靖光弼以上勛元宰移守盟津卽知急病抹艱
因事爲重以卿近破狂虜已著英名河內當賊咽喉
爲吾雄屏爰求威望將以撫寧昔漢光武謂寇恂曰
潁川迫近京師當以時定惟念卿獨能平之從九卿
復出憂國可知也卿勿以累換雄藩輕此寄任策勛
之日遷擢必殊詔到便宜擇精兵二千人自領赴鎮
直抵萬善震耀威聲壯忠武一本作捕鹿倚角之形分常
蛇首尾之勢今屬水潦將至農事已興偃武息人固
難淹久勉弘方畧副朕誠懷

賜王宰詔意

將帥大畧前史備書保境者以守險自固進攻者以
過險必尅制其死命務須批亢今賊在網羅只守巢
穴廣立虛柵多設疑兵蓋謂自防豈暇侵軼且欲偷
安歲月以老王師鄉分兵相守果中奸計况鄉已得
天井尋扼咽喉遊刃其間更何顧慮聞天井前後寨
柵二十餘所以備奔衝如此費兵固須寡力料賊四
面設備兵數可知卿進大軍便須拒捍何暇更於諸
路敢軼封疆以近事明之足可爲據昨者榆社兵馬
盡赴太原自沁至儀五百餘里賊已却得石會其間
細路至多數旬無備竟不馳突卿以此揣度可見其

情又諸軍都頭各守一寨遷延避寇苟務過時卿若更廣詢謀取其自便必恐撓卿思慮難見成功卿宜密度事機自爲心計其賊踞逼近州縣及當卿腹背受敵之處卽須留兵防守用備寇虞其他抽隨大軍併力攻討如此則出其不意必覆妖巢國家無徵蒞之勞計司減饋運之費足得制勝豈在濟師又聞每度出兵傷夷不少待其瘡痛皆復不免戰鬪闕人今爲鄉方圓無所愛惜其陣沒官健如魚子弟便別擇少壯者充替其亡歿家糧賜亦許不停其傷夷校重有妨役使者亦任擇人充替其傷夷者仍不停糧非

惟感勵士心亦冀漸完兵力卿宜以此宣示各使聞
知故令中使專往看卿處置須待事了方得遣回

賜石雄詔意

與王宰詔同於奸計字下云聞冀氏翼城寨柵有一

十八所以備奔衝自此以後又與王宰詔同至各使

聞知下云又聞將士有苟避兵鋒全不得力者卿宜

便令守寨不要將行其彥佐隨使衙隊自大將至宴

設及工巧之徒除卿先令歸本道外聞在者尤多卿

既領節旄自有土地並宜曉諭蒞遣不要更留仍具

人數奏聞雖卿善於撫衆皆自樂從然亦在割情不

令撓事故令中使專往看卿處置卿須待了方得遣

回

賜王元逵何弘敬詔意

與彥佐等詔同何後別各存處分

比緣暑熱未退固難進軍想卿至誠豈安終食今清
商已至鞞鼓聲雄白露將凝戈鋌氣肅擊隼應節而
逾厲代馬嘶風而自豪順天行誅正在今日近者天
井冀氏頻有交鋒蓋緣卿等當軍未抵邢州莫分賊
勢併有精卒得以奔衝今四面王師一十萬鎮魏兩
軍自當其半屯集在境已及歲期雖罰罪除殘誠無
所憐然生人膏血杼軸其空朕既為父母豈可坐延

歲月想卿忠憤固不懷安况卿當道頃爲盧從史劉
從諫所敗與澤潞素是深讐卿之騎兵海內精勁將
虜劉殘憤士有闔心宜乘此機豈可玩寇想詔到之
後速抵邢州但得綴其精兵不合併力西向朕當詔
王宰石雄齊心攻討破此殘寇決在今秋故令中使
往諭朕意想卿勿更疑惑副茲朕懷

何弘敬詔中改未抵邢州爲未過漳河况字
以下改爲卿奉親之孝朕所深知想陟岵有
懷循陔思養遠離周歲固切歸心當早決機
豈宜玩寇

賜王元逵何弘敬詔意

近頻捉得賊界生口及收得投降人等每知賊中精
卒數亦無多只是應急旋抽併當一面破其此計實
在共攻緣王宰即過乾河便抵澤州城下恐賊併取
山東兵馬抗拒南面王師卿宜詔到日便須深入綴
其精卒不遣東西旬月免有秣兵王宰必能成事如
因此犄角便克澤州則卿之功勛更高王宰朕每念
陳兵原野又屬炎熱由此孽童致茲暴陵然撿抗孔
亟周宣興六月之師淮夷未寧公且有三年之後事
非獲已諒匪勞人卿當深躰朕懷早圖戡翦上薦功

於宗廟下息患於生靈則卿之子孫未受休祿朕之
酬賞必極寵榮布告三軍咸令知悉

賜緣邊諸鎮密詔意

近者寇孽初平海內無事方欲求橐弓矢保乂生人
圖遠開邊誠非朕志然盛衰倚伏皆有其時古人云
聖人無巧時變是守蓋惜其時也昔漢武帝命將出
師輕齎深入耗中國三十餘年竟不得臣伏匈奴蕩
定沙漠此未得其時也至宣帝值匈奴百年之運因
懷亂危亡之機單于稽首三代偃藩烽燧不設邊城
晏閒此遭遇其時也近則回鶻常以兵助中國有戡

難之功朝廷累降姻親歲致繒絮因我爲援振服諸
番百有餘年最爲強盛及本國衰亂種落流離景附
北邊猶爲桀驁因其入塞暫舉偏師遂大破穹廬却
收公主歸降甚衆梟戮至多一國銷亡易於拉朽豈
非得其時也今吐蕃未立贊普已是三年將相猜携
自相攻擊緣邊兵馬頗已抽歸想其城鎮皆空守備
多闕儻彼鬪戰未定自有黨讎一國之中疑懼相半
則備邊城守固有異心計卿軍鎮必有舊人諳練邊
事深入窺探來往是常易知隱伏之情足見存亡之
兆宜精意選練務得其人切須識見精專誠信可保

資以財帛俾其陰通自隴山天寧關北至蕭關原州
安樂州烏蘭橋等皆是賊之險路入寇要津各要知
兵馬多少何人主領如兵數寡少人心動搖乘此危
機必易爲計多設反間密用竒謀使自歸心豈勞兵
力觀釁而動取若拾遺此兵法所謂不戰而屈人之
兵善之善也國家河西隴右四鎮一十八州皆是吐
蕃因中國有難相繼陷沒今當其破滅之勢正是倚
伏之期取亂侮亡聖人遠畧斯乃以直報怨非是不
守和盟想卿精忠必達此旨故令劉濛專往親諭朕
懷卿宜選練師徒多蓄軍食使噐甲犀利烽火精明

尺籍伍符盡無虛數務修實效勿顯事機制置之間
尤須密靜詔書有所不盡皆已指示使臣勉建良圖
副茲委遇

停歸義軍敕書

敕李思忠首率蕃兵歸誠向闕念其忠款特許來朝
而又久慕華風願留京邑俾參環衛用報勛庸其歸
義軍使宜停將士等同叶義心所宜優寵况聞諸道
軍鎮皆置馬軍選擇蕃渾尤不易得緣此將健久工
騎射頗出常倫列於牙旗足壯我閫宜分諸道節度
使團練收管便給本道衣糧稍加安存務令得所

置孟州教旨

敕昔馮異之守盟津已建軍號近光弼之保伊洛先據三城蓋以河有造舟之危山有摧輪之險左右機軸表裏金湯旣當形勝之地實爲要害之薨今所置制豈限常規積萬庾於教前尤資地利到二矛於河上須壯軍聲其河陰縣宜割屬孟州仍改爲里縣其河清縣却還河南府縣官等並准前敕處分其東都鎮遏兵馬依前屬東都防禦使鄭滑汝州防戍兵各一千人令弘敬權指揮事平後續有處分

李回宣慰三道教旨

李德公文集 卷第七
十一
十一
敕成德軍魏博皆出兵甲俯臨賊境秋氣已至攻取
是時元達弘敬制勝伐謀必有成筭固須命使遠訪
嘉猷又回鶻雖已遁逃尚存餘燼今朔風始勁塞草
具腓猶慮未革梟音敢懷狼顧迫於飢窘復擾邊城
仲武久欲蕩除俾無噍類成其志業壯彼威聲亦在
使臣往喻朕意各宜奮厲早建殊勛解甲勞還免及
祁寒之候止戈除害庶臻仁壽之期咨爾帥臣副予
委遇宜令刑部侍郎兼御史中丞李回克幽州鎮魏
等道宣慰

賜王宰詔意

卿頃在澤州頗彰惠政彼之黎庶自合有情申以恩
威正在今日卿宜大布誠信且務綏懷不得焚其室
廬翦其桑梓自當臺梁塞路襁負而歸兼招取丁壯
三五千人不要分給器械每至填壘皆遣先驅
料澤州城內非其父兄卽其子弟必合自相愛惜豈
願交接兵鋒兼領遣使逼其軍城再三號令若能捨
逆效順速自歸降非但生全仍加優賞克城之後不
杞秋毫如堅守危巢坐待撲滅必當不存噍類務極
兵威料其聞此先聲皆自感厲勉於方畧副朕深懷

李文饒文集卷第七

化園書館

carhua library

開化圖書館

Kaichua library

開化圖書館


Kaishua library

開化圖書館

kaichua library

開化圖書館

Wakuhwa Library




李文饒文集
—

開化圖書館
Kahua Library

開化圖書

Kaishua library



TIFFEN Color Control Patches

© The Tiffen Company, 2007

Blue Cyan Green Yellow Red Magenta White 3/Color